

D. I. M. E. N. T. D.

QUÆSTIONES MEDICÆ DUODECIM

AB ILLUSTRISSIMIS VIRIS

R. R. D. D. JOANNE-FRANCISCO IMBERT
Cancellario amplissimo & Judice, HENRICO
HAGUENOT Decano Venerando, ANTONIO
FIZES, FRANCISCO DE SAUVAGES,
FRANCISCO DE LAMURE, GABRIELE-
FRANCISCO VENEL, CAROLO LE ROY
Regis Consiliariis, Medicis, & Professoribus meri-
tissimis.

PROPOSITÆ

In Aulâ Episcopali Mospeliensi coràm Illustrissimo ac Reverendissimo
D. D. FRANCISCO - REGINALDO DE VILLENEUFVE,
Mospeliensium Episcopo, Comite Melgorii, & Montisferrandi,
Marchione Marquerosæ, Barone Salvii &c. Regi à Consiliis secre-
tioribus.

Pro Regiâ Cathedrâ vacante

Per promotionem R. D. JOANNIS-FRANCISCI IMBERT Professoris Regii
ad Cancellariatum dictæ Universitatis.

*Quas Deo favente, & auspice Dei-parâ propugnabit triduò integro manè &
serò diebus 19. 20. & 21 mensis Februarii anni 1761.*

IN AUGUSTISSIMO LUDOVICEO MEDICO MONSPELIENSI

GASPARDUS-JOANNES RENÉ Mospeliensis D. M.



MONSPELI;

Apud AUGUSTINUM-FRANCISCUM ROCHARD, Regis & Universitatis Medicinæ
Typographum unicum. 1761.



Digitized by the Internet Archive
in 2020 with funding from
Wellcome Library

https://archive.org/details/b31957328_0001

9

ILLUSTRISSIMÆ
SCIENTIARUM SOCIETATI REGIÆ
MONSPELIENSI
CUM ALMA^A QUÆ PARISIIS EST ACADEMI^AÆ, CONJUNCTÆ.



IRI ACADEMICI ILLUSTRISSIMI,

*Quàm decorè, quàm humaniter, apud vos hospitentur
Musa, quam cordi vobis sit Artium splendor & incrementum,
jam diù vestra etiam celebritas fecit, ut tum inter nostros,
tum inter exteros nullus omninò ignoret.*

*Quibus igitur auspiciis utar ego faustioribus, ut in lucem
me proferam de Palmâ disputaturus, quam si vestro judicio
valeam promereri, nihil est quod ultrà exoptem, Sublimi
feriam sidera vertice.*

*Enim verò si Populari aurâ civilique studio tantoperè
delectamur, propterea quod sine illis beatitudinem vitæ
nullam esse posse benè cordati judicavere, quantò propior
medullis voluptas adest sensusque jucundior, habere existi-
mationem & gratiam virorum in omni genere Litterarum &
Doctrinæ exercitatisimorum!*

*Tunc enim quasi novâ ingenii & virtutis accessione, nostra
nobis evanescit tenuitas, factoque ad sapientum benevolen-
tiam ascensu, ad illorum quoque naturam & decus erectos nos
facile arbitramur.*

Atquè ea sunt ingeniorum incitamenta , ingentes illi stimuli quibus Artium fortuna promovetur & crescit : quæ si è medio tollantur , Artes vilescere necessum est , & cum illis præcipua rei publicæ ornamenta interire.

Nam etsi multò laudabilius sit laudem aspernari strenuè , quam ambitiosius aucupari , attamen quæ nostra est hominum infirma conditio , ad præclarè facta vix unquàm allicimur nisi spe utilitatis cujusdam , nec virtus ipsa dulcescit suaviùs , quam cum illita laude & gloriâ commonstratur.

Quod quidè expertum me esse libenter confitebor , qui magna Bella , & quæ forsàn vires excedant meas , minùs impavidè agitare , nisi daret animos , & virtutem incitaret vestræ comparandæ laudis immensa cupido.

Favete igitur Athletæ , quem sui commilitones vocant invictissimum , nec credunt , quemque veriùs ego , credite Viri Illustrimi , vestrum vellem appellare ; quid de se prolixius si forsàn hic dixisse videbitur , hoc illi condonandum , quod de vobis egregiè dicere imparem se planè sentiat. Vetuit dein summi Præsidis vestri summa modestia , nè de ipso unum quidè proferrem verbum ; quæ lex quàm non satis æqua sit , cum bonâ illius veniâ , affirmare non dubitarem , si tam mihi facilè foret eleganter Scribere , quàm illi , sapere altè , agere semper pulchrè & rectè , præesse cum beneficiâ & sinè fastu. Valete ,

VIRI IMMORTALITATE DIGNISSIMI ,

Offerebat xi^o. Kal. Martii. Anni M. DCC. LXI.

Dedictissimus vobis
& Cliens & Servus.

GASPARDUS-JOANNES RENÉ D. M. M.



QUÆSTIO PRIMA.

*Quænam sint organa secretoria excretoriaque Bilis cysticæ ;
& quinam præcipui Morbi ab hac vitiosâ Bile pen-
dentes ?*



INA desiderantur in propositâ disquisitione ; 1°. Scilicet ut perpendantur, quænam sint organa secretoria excretoriaque Bilis cysticæ ; 2°. Quinam diversi sed præcipui morbi ab hac vitiosâ Bile pendentes : his ut fiat satis, & vela tractationis nostræ expandamus, primam problematis partem ex Anatomicis eruamus.

Hepar vastissimum viscus, mediante peritonæo diaphragmati adhærens, in hypochondrio dextro positum, indè versùs latus sinistrum porrigitur. Munus hujus consistit in secretionem humoris biliosi, à sanguine per venam portarum asportato separati, qui per peculiare ductus minores, & tandem in truncum & canalem collectus, quem ductum hepaticum vocant anatomici, ex hoc per diverticulum communem choledochum, ad intestinum duodenum transmittitur.

In singulari capsulâ hepatis annexâ, pluribus tunicis conflata, vesiculâ seu cystide felleâ vulgo dictâ, colligitur idem humor, adservatur, & peculiari etiam ductu, qui cysticus dicitur, in ipsum quoque duodenum hac ratione deferitur. Vesicula hæc fellea, pyriformis, peculiare receptaculum, quibusdam tamen animantibus denegatum, sub majori hepatis lobo & intra imam ejus crepidinem insidet, cui adnectitur, interventu vasorum sanguineorum, communis tunicæ, & processus capsulæ Glissonianæ (a) ; latus versùs quo hepatis figitur, pluribus adnectitur filamentis, propriam hepatis substantiam

(a) Bianchi de hepate. t. I. p. 100.

penetrantibus; quos inter reperiuntur ductus, poros inter Biliarios & vesiculam communicantes, ductus hepatico-cystici nominati (a). Jam verò undenam Bilis cystica suam habeat originem, non una eademque est scriptorum consensus: existimant quidam hujus capsulae tunicam, glandulosam esse, quæ separet Bilosum à sanguine humorem, quam irridet confabulationem immortalis Author eximii tractatus de Morbis hepatis. Alii putant, quod per peculiare & proprios ductus cystico hepaticos ibi congeratur; non nulli per ductum hepaticum in vesiculam ingeri statuunt: nos Clarissimorum Virorum experimentis suffragantes, credimus, ad hanc cystim tendere Bilem hepaticam, per cysticum canalem, partim etiam per plures minimos ductulos Biliarios, ex hepate immediatè ad vesiculam vergentes (b); nec Celeberrimi Halleri moramur argumentis (c), qui ligato ductu cystico, vel calculo cystici ductus iter præpediente, præter mucum insipidum, ex accinis tunicarum (ut credit) separatum, nihil vesiculæ inesse voluit: quibus positis, manifestum fit, quod cum Bilis in propriâ cystide non separetur, omnes accini glandulosi in substantiâ hepatis reperiendi, ductus hepaticocystici ab his in vesiculam tendentes, ipseque hepaticus ductus quo partim asportatur, pro meris liquoris hujusce cystici organis secretoriis habendi sint: unicus datur ductus excretorius, cysticus nempe, qui pluribus frenis cellulosis interiùs revinctus, in numerosas rugas eminet, quæ conjunctim aliquam valvulae spiralis speciem referunt, is sinistrorsum ad hepaticum migrans, bini per angulum acutum uniti, ductum choledochum constituunt.

His compendiosè positis, alteram nunc problematis partem attingamus. Morborum ex Bile cysticâ vitiatâ nascentium, ingens apud Authores reperitur numerus. Peccare potest Bilis hæc, vel quantitate, vel qualitate, aut excretionis defectu; notando quod si non debito excernatur modo, morbi tunc à quantitate, aut qualitate pendentes ortum inde trahere possint, quia majori copiâ coacervata, nimiam propter moram, vitia contrahat. Ab his pendentes præcipui Morbi, (ut mentem nostram scriptis meritissimi Universitatis Cancellarii Jure quodam accomodemus (d);) sunt.

(a) Winslou trait. du Bas-ventre n°. 296.

(b) Testatur Illust. Bianchi hist. hepat. p. 111 & 112 quod vasa hæc quorum duplicem constituit classem, sæpius perscrutatus in bobus, equis, suibus & molossis, à vesicula ad remotiores & minutiores pororum Biliarium propagines progredientia conspexerit. Jam antea notabiliter cava fluidoque Bilioso saturata, fuerant detecta à Glissonio, Rudbeckio, Blancardo, Bartholino, Verheieno aliisque.

(c) Prim. Lin. phis. n°. 690.

(d) Vide eximium tentamen de Calc. Bili. prop. pro Baccal. an 1758 cap. 8. de Morb. &c.

1°. Icterus, morbus cachecticus decolor, varias sui complectitur species in flavum namque, viridem, nigrum, nativus cutis mutatur color; quæ mutatio refluxui Bilis ad sanguinis oceanum, moxque cum ipso circulationis legibus ad habitum corporis exteriorem, debetur (a). Hujus causarum numero adstruenda sunt, ea, quæ excretionem versus tubum intestinale præpediunt, obstructione vesicæ felleæ, emissarii cystici, aut canalis choledoci, quibus ansam præbent Bilis spissa, viscosa, tenax &c.

2°. Cystitis seu inflammatio vesicæ felleæ; in hoc enim casu extrema arteriarum cysticarum, nec-non ramificationes venæ portarum texturam vesiculæ perreptantium, sanguine infarciuntur, obstruuntur, cætera accedunt inflammationi necessaria; quæ cuncta à congesta & exuperante Bile, nec-non à calculis in cystidis cavo efformatis, natales debent; facile etiam hinc patet colica cystica, à vasorum nempe & membranarum distensione; vel ipsiusmet vesicæ membranularum ruptio (b).

3°. Biliosus vesicæ felleæ hydrops, hunc fieri opinatur Illustr. Imbert, quotiescumque Bilis cystica, proprio receptaculo copiosissime coacervata, neque per bibula vasorum revehentium oscula proportionaliter resorpta, inhabilis est de cætero transitui è vesiculâ ad duodenum, ob penitus obturatum à calculis collum vesiculæ, ductum cysticum, choledocumve.

4°. Tandem calculorum Biliosorum efformatio; pluries namque in humano corpore gigni, tum Cadaverum apertura, tum millena Practicorum testantur observata; his non sola infestatur vesicula fellea; ductus cysticus & meatus choledocus, obliti non semel conspiciuntur; de quorum vario efformationis modo, non est quod solliciti simus: Horum præsentia, morbos supra memoratos ut plurimum procreare solet, ut luculentissimè à jam laudato merit. Cancellario fuit demonstratum.

Non hi soli sunt affectus ab hac vitiosâ Bile pendentes, cum enim alimentorum digestionem & chyli elaborationi, in duodeno opituletur; hujus defectu, vel vitio, male subactus & elaboratus fit chylus, plurimum morborum exin soboles, de quibus non hic differendi locus, ex quibus collatis patet.

Quanam sint organa secretoria excretoriaque Bilis cystica & quinam præcipui morbi ab hac vitiosâ Bile pendentes.

(a) Pulmones quoque colore citrino in ictero tinctos, observavit Zachias Quæst. Med. legal. t. 3. consil. 15 & in viro icterico, non tantum omnia viscera, ossa etiam & cartilagine flavo colore tinctos vidit Dolæus Encycloped. Med. Dogm. lib. 3. pag. 261.

(b) Vid. idem Tent. de Calculis pag. 87.

QUÆSTIO SECUNDA.

An structura Anatomica Pulmonum magnam lucem afferat in explicandâ hujus visceris inflammatione?

QUAM eximiam utilitatem accuratior corporis humani, per diligentiores anatomicas acquisita cognitio fœneret, nemo non videt. Nisi enim quis, partis istius, in quâ causa morboſa tyrannidem suam exercet, & cui firmitus inhærescit, certam, quoad structuram & usum, habeat notitiam, is non solidum de morbo judicium, aptè indicare potest. Cum itaque nobis propositum fuerit, num Anatomica Pulmonum structura, magnam lucem afferat in hujus explicandâ inflammatione, fabrica & usus illius visceris, veniunt prius animadvertenda.

Pulmo, corpus spongiosum, immediatum respirationis organum, thoracis cavitate coercetur; in duos lobos principes dividitur, à se invicem ope mediastini diremptos; major est Pulmo dexter, itemque frequentius in tres lobos semisectus, binos tantum ordinariò obtinet sinister, rursus uterque lobus in minores & minimos ope cellulosa telæ, textus interlobularis nomine donatæ, per media intervalla divisos, tandemque in cellulas exiguas, membranosas, inter se communicantes, resolvitur. Per celebres sunt Anatomici qui contendunt dari fibras carneas, contractiles, illis cellularum membranis intermediis, de quibus tamen certior à nonnullis observatio desideratur. Pulmoni exterior membrana, simplex, tenuis, plevræ continua, intervalla lobulorum pontis instar tegit; interior verò, pro textus cellularis expansione à Vinslouwio habita, intimos loborum recessus penetrat, vaginamque vasis pulmonaribus, usque quo pericardium subeant, suppeditat.

Quadriſariam dividi solent vasa substantiam pulmonum, pro majori parte, constituentia, in aërea nimirum, sanguifera, lymphatica & nervea. Aërem in Pulmones adducit aspera arteria, ductus à larynge ortus, membranaceus partim, partim cartilagineus; hic ad curvaturam arcus aortæ, in duos ramos, trunco similes finditur, quorum uterque in suum abit Pulmonem, ubi miras patitur subdivisiones; donec decreſcente cartilagine, ultimi bronchiorum ramuli, membranei fiant. In interiori asperæ arteriæ parte, & per totum ramorum tractum, sedent

sedent glandulæ, subnigræ, sat consistentes, per exiguos ductus poris similes, cum cavo tracheæ communicantes, quarum usus adhucdum in ambiguo.

Sanguifera Pulmonum vasa sunt, arteria & vena pulmonaris; illa à dextro cordis ventriculo ortum trahens, pervenit, ascendendo, ad divisionem bronchiorum, bifariam tunc dividitur & suum uterque ramus ingreditur Pulmonem, ibi in innumerabiles ramos ramulosque, textu interlobulari suffultos, infinitis anastomosis inter se communicantes, divisi, desinunt tandem in venulas, quæ easdem ac arteriæ, per omnem Pulmonum textum, passæ divisiones, quadruplici trunco adunatæ, in unum coeunt sinum Pulmonalem vocatum, reducemque sanguinem in auriculam sinistram, & ex eâ in ventriculum sinistrum devehunt. Non hæc sola sunt vasa sanguifera, dantur prætereâ arteriæ venæque bronchiales, quæ Pulmonum nutritioni inservire creduntur.

Duplex vasorum limphaticorum genus est in Pulmonibus; alia, valvulosa, vasorum aliorum, internum visceris illius textum perreptantium, iter sequentes, limpham in ductum thoracicum revehunt, alia verò in superficie Pulmonum reticulum efformant, horum obscurus adhucdum exitus, aut decurrendi modus. Pluribus & etiam nervis gaudent Pulmones, per totam suam compagem distributis. Adsunt tandem vasa tenuia, limphatica bronchialia dicta, rorem limphaticum è sanguine secretum vehentia, qui in cavum bronchiorum effusus, nunc sensibili, nunc insensibili formâ, mediante aëre, expirationis momento, foras amandatur.

Copia sanguinis quæ Pulmonem subit, æqualis est illi, quæ ad totum corpus, eodem tempore, deferitur, patet hinc summa visceris hujus utilitas; consistit præcipuus ejus usus, in fovendâ sanguinis circulatione; cum enim variè plicata & contorta fuerint sanguifera Pulmonum vasa, necessum erat ut ab aëre, inspirationis tempore, Pulmones ingressuro, expanderentur vesiculæ, & evolutis sic vasis per eorum parietes repentibus, facile posset exerceri sanguinis circuitus: per totum quoque corpus circulatæ, hunc motum fovet Pulmo, ut ex eo liquet, quod læsâ respiratione, ægrè admodum ac motu interturbato peragatur circuitus, penitus verò sufflaminatâ, cordis & sanguinis circularis motus pereat: in atterendâ etiam, subigendâ & miscendâ sanguinis compage, multum inservire luculentissimum est.

His de Pulmonum fabricâ & usu propositis, institutum nunc prosequamur. Ex primariis humanum genus excruciantibus morbis, omnium maximè, principatum tenent inflammationes: tot enim diversas corporis nostri partes aggrediuntur, pro variâ sede diversum nomen adeptæ, ut vix ullus sit acutus morbus, qui ab eâ non pendeat, aut

saltem qui hanc citiùs, vel minùs citò, sibi comitem non adjungat. Has inter meritò eminet, illa quâ Pulmones infestantur, quæque peripneumonia nuncupatur; stipatur febre acutâ continuâ, difficultate respirandi, tussi, sputo ut plurimum cruento & dolore pectoris gravativo.

Difficilem sanguinis transitum, in vasis pulmonum arteriosis sanguiferis minimis, vigente, imò & quandòque adauctâ, cordis & arteriarum vi trusivâ, causam esse continentem peripneumoniæ, sat receptum est, ideo quod eâ positâ, ponantur symptomata morbum constituentia, absque eâ, difficulter concipi possint; quibus habitis, evidenter patet, cognitâ semel structurâ Anatomicâ Pulmonum, facilitè explicari posse visceris hujus inflammationem; & quidèm.

Ab aëre, in Pulmones immediatè agente, vasa fulciuntur sanguinea; hoc adjuvatur & acceleratur sanguinis circuitus: facilitè igitur interturbabitur sanguinis motus, ægrèque Pulmones permeabit cruor, si elatere nimio, vel fracto gaudeat; si caliditate aut frigiditate nimia peccet; si partibus hæterogeneis, aut venenosis sit inquinatus; nam vel nimia aut præcipiti, vel insufficienti aut languidâ aërearum vesicularum explicatione, rarefactione vel densitate sanguinis, imminutâ vel cohibitâ pulmonari perspiratione, diversisque pro variâ indole, aërem conspurcantium miasmatum effectibus, per valcula Pulmonum præpedietur sanguinis transfluxus, hinc peripneumonia,

Vasa præterea sanguifera, in molli & spongioso hoc viscere, summè tenuia sunt, contorta & complicata, ad hæc solus appellit venosus sanguis, ut elaboratione fiat arteriosus; si ergo cruor quantitate, qualitate, vel in motu vitatus, copiosius ad Pulmones detrudatur, aërisque de cæterò indoles, & actio in Pulmonum vascula, quantitati, qualitati, aut motui sanguinis viscus illud transantis, non respondeant; hujus facilitè subsequetur inflammatorius morbus, ut Vere & Autumno frequenter experiri datur. Quibus perpensis, jure quodam concludere fas est.

Strukturam Anatomicam Pulmonum magnam lucem afferre in explicandâ visceris hujus inflammatione.



QUÆSTIO TERTIA.

Quibusnam auxiliis diversorum Venenorum in Corpus humanum actioni succurrendum?

VARIA inter, quæ in universo Artis nostræ ambitu digna sunt, ut altâ indagine & accuratiori perlustrentur scrutinio, locum certè mereri videntur Venena & modus quo ipsis est opitulandum: quot enim & quantas edant strages, mens meminisse horret. Amplior quidem est demandata Provincia, ut in omnibus punctis absolvi possit; ast in gravissimo enodando problemate, operæ & tempori parcemus.

Venenum, ex Meadio (a), illud omne dicitur, quod parvâ copîâ datum, animantium vitæ itâ contrarium est, ut vel per os sumptum, vel extrinsecûs adhibitum, ei destruendæ sufficiat, aut saltem funestos producat effectus. Cum de Venenis eo proprio nomine donatis sermo sit; ea tantum intellecta volumus, quæ in minutissimâ ut plurimum sui quantitate, insignem corpori noxam inferunt; attamen ut egregiè annotavit Sennertus (b), ea omnia quæ quandoque prosunt, è Venenorum numero non sunt excludenda, nec ea pariter quæ quandoque nocent in Venenorum numerum refferenda sunt; fidem de cætero faciunt observata, fuisse nonnullos adeò Venenis assuefactos (c), ut etiamsi dosi portentosâ assumerentur, nihil tamen indè damni perpeffi fuere.

Trifariâ Venena dividit Boerhavius. 1°. Nimirum in ea quæ vasa constringunt, aut erodunt. 2°. In ea quæ liquida coagulant. 3°. tandem in ea quæ motum humorum circulatorium interturbant; verum cum adeò intricata horumce plurium actio lateat, ut conjecturis, ut plurimum insistere necessum sit; nos, missis omnibus, quæ Venenorum agendi modum in corpus humanum spectant,

(a) Mead. Examen Venenorum introduct. p. 1.

(b) Pract. Libr. 6 Part. 5 Cap. 1. quod fusiùs in 5°. probl. enucleatur.

(c) Mercurial. de Venenis Lib. 1. Cap. 6. reffert anum quamdam, 30 Cicutæ dragmas, absque noxâ, deglutire consuevisse. Gaspar à Reies in Elysio Jucund. Quæst. Campo, memorat de Filio Cambaiæ Regis adeò Venenis educato, ut Muscæ solo suctu, interirent. Narrat Rodiginus Lib. 11. Cap. 13. Puellam, à Rege quodam Indorum, doloso munere, Alexandro Magno fuisse oblatam, quæ spûto appropinquantes, & coeantes respiratione, interimeret.

prout à nobis non expetita, adeoque hic supervacanea ; horum tantum effectus, constanti clinicorum observatione Compertos, ipsis que opitulantia auxilia, enucleare consilium duximus.

Triplex naturæ regnum peculiaria Venena profert; communior hinc & receptior apud scriptores divisio, in Venena vegetabilia, mineralia, & Animalia: horum potentissima in regno Animali hospitantur, quæ morfu ordinariò, ictu, vel afflatu, ab animantibus rabie vel irâ percitis, communicantur; noxia & quoque non nulla existunt, si cum Cibo vel potu deglutiantur: secundum tenent locum Venena, quæ minerale regnum suppeditat; his proximè accedunt quædam è vegetabilibus: in quo ordine, pro virium tenuitate, pertractando (nè nimium increlcat opella) eminentiora tantum & usitatoria proponemus, quibus quidem positis, aliorum praxis facili negotio derivabitur. Sint itaque

VENENA ANIMALIA.

1^o. Venenum, quò non sævius, quò non nocentius ullum, hydrophobicum. Plura sunt huic obnoxia animantia, frequentius verò cæteris Cani, Lupo, Vulpi, morbus oritur. Morfu sæpissimè hominibus communicatur; varia tamen prostant observata (a), virus è solo spumæ attactu serpere posse, quandoque etiam aliis modis. In salivali humore latere ut plurimum Venenum hocce (b), nemo ibit inficias; quod quidem à Rabiolis, sanis animantibus, viâ quâlicumque infusum, multiplicia ac tetra symptomata producere, aptum est: horum præcipuum & ex omnium consensu pathognomonicum, per quod definiri solet morbus, est horror aquæ & potulentorum; cætera verò, cum variè à variis enarrentur, vix ad idem morbi genus pertinere videntur,

(a) Mathiolus in 6 Dioscoridis Cap. 36. Cæl. Aureli. acut. Morb. Lib. 3. Cap. 9. Palmarius Lib. 6. de Morb. contag. Skenckius Libr. 7. P. 848. præterea Fernelius, de Lupo rabioso memorat, cujus carnem esitantes in rabiem acti sunt. & Lemery. Act. Acad. 1706 de sanguine epoto. Narrat Hoffmannus de hydrophobiâ per coitum communicata; potest etiam serpere ex inspirato aëre ab Animali rabido expirato, vid. Arætei Morb. acut. Lib. 1. Cap. 7. & Observ. D. Razoux in Diar. Novemb. 1757. tandem spontè in homine fuit producta; narratur in Miscel. Nat. Curios. 1706 de Juvene, qui irâ excandescens, digitum momordit, unde hydrophobus intra 24 horas factus est; Mulierem vidit Malpighius Oper. posth. hydrophobam à morfu Filix Epilepsiâ correptæ vid. etiam Vansvieten T. 3. Pag. 537. & Brogiani de Ven. narrat vidisse bis hydrophobiam ab acutis Morbis exortam.

(b) Confer. egreg. Differ. Illustr. Sauvages, Thes. merit. Astruc. Monsp. propug. anno 1719. & Celeb. Vansvieten.

tur, hæc idcirco brevitati studentes, silentio premimus.

Quamvis Venenum hoc valde activum & penetrans sit; in corpus tamen receptum, sæpe diu latet, priusquam vim suam exferat (a); frequentissime vero circa quadragesimum à suscepto Veneno diem, interdum citius, ubi præsertim saliva immediatè infecta fuerit, sese manifestare, exemplis probat Illustr. Sauvages.

Varia omni ævo, ad virus hocce debellandum, fuerunt celebrata auxilia; hæc præcipuè, quæ à rabioso Animali desumuntur, hujus hepar vel carnem, assami suadent non nulli, alii pilos vulneri apponendos esse volunt, quæ anilia esse commenta meraque nugas, agnoscunt prudentiores bene multi: cineres Cancrorum fluviatilium, vel solos, vel additis Thure & Gentianæ radice, miris laudibus effert Galenus: pulverem habet *Palmarius*, cujus tantam esse credebat efficaciam, ut nullâ vulneris habitâ curâ, quocumque victu uterentur demorfi, certa sanatio ab ejus usu posset spectari: multum laudat *Meadius* pulverem Antyllisum dictum, qui conflatur è Lichene cinereo terrestri & Pipere nigro: Acetum pro specifico commendatur à *Kramero* (b), præsertim si addatur Pulvis Cantharidum, &c. de quibus certiorē experientiam desideramus, hanc verò cum sanioribus excogitamus medendi methodum.

Duo in hydrophobiâ veniunt distinguenda tempora, unum scilicet in quo demorfi futurum sibi timent morbum, alterum verò in quo experiuntur; sic quoque binæ curatoria methodi: quoad primam; statim à suscepto contagio, scalpello circumcidenda est Pars, ne altius inde prorepāt, admovenda dein vulneri cauteria, volunt plures ut abscissâ parte, Aquâ sale marino turgidâ, vel aceto abluatur, alij cucurbitulas, hirudines, scarificationes faciunt multi; verum si locus hæc respuat auxilia, cathæreticis tunc & pyroticis utendum; laudantur in hunc finem Lapis infernalis, Præcipitatum rubrum &c. cautè interim est attendendum, ne vulnus citius coalescat, & Veneni seminia concludat; hinc supurationi insistendum.

Veneni miasmata, ad sanguinis alveum delata, educenda, vel alteranda sunt; vena idcirco plus minusve secetur; purgatio identidem instituatur, Emetico-catharticis; blandis dieureticis, urinæ sunt proriandæ; profunt mirificè & extolluntur, medicamina è Mercurio deprompta, tum internè sumpta, qualia sunt Panacea mercurialis, Mercurius dulcis, Turpethum minerale (c); tum, quod satius ducimus,

(a) Consul. Act. Acad. Monspel. 1730. Astruc de hydroph. Mead. Tentam. 3. P. 79. Fabr. Hill. Cent. 5. Observ. 86. is Matronam novit quæ per 30 annorum spatium, singulo septennio, recrudescentiam Veneni patiebatur.

(b) Vid. Essais & Observ. de Med. d'Edimbourg T. 7. Pag. 106.

(c) Doct. James Turpethum minerale æquè esse specificum in hoc morbo vult, ac aliud quodcumque pro suo morbo vid. Diar. erudit. mensis Septembr. 1744.

leves sed repetitæ, Unguenti Neapolitani (in parte præcipuè demorsâ) inunctiones; non neglectis interim diluentibus, subacidis, varis lactis generibus, Balneis &c.

Dum verò confirmatæ hydrophobiæ, sese in conspectum produnt symptomata, spes est in angusto, & vix ullus vitat libitinam, omnia idcirco tentanda, nam in evidenti mortis periculo, ex *Celsi* præcepto, *satiùs est anceps experiri remedium quam nullum*, modò tamen fatum inde non acceleretur; adhibenda sunt venæ sectiones, balnea, Nitrosa, Mercurialia intùs & extùs, aliaque; verùm iis peractis, mors sæpissimè medentis partes agit.

2º. Venenosa inter animantia, non infimum tenet locum Vipera. Pluribus de ipsius historiâ & anatome, ad præsens institutum non pertinentibus, prætermittis; arbitramur cum *Redi*, *Meadio*, aliisque, hujus Venenum esse liquorem subflavum, vesiculis duabus depositum, ad radices dentium incisiorum, quod vulnere ab ipso Animali, aut instrumento quodam factò, instillatum, citò de medio tollit. Hæc solent rescenseri, morsum subsequenter symptomata; pars non solum demorsa, sed non numquam vicinia, in tumorem vario colore stipatum elewantur; dolor insignis, ægrotantem miserè affligit; accedunt languor, totiusque corporis debilitas; pulsus celer fit, debilis & quandòque intermittens; motus convulsivos frigidus comitatur sudor; supervenit icterus; adsunt vomitus biliosi, singultus, syncopes aliaque sexcenta, mors ipsa tragædiam claudens, nisi promptior medela.

Tota pendere videtur curandi ratio, ut Venenum statim extrahatur, ut inhibeat ne ad interiora serpat, & ut si quid jam in sanguinis oceanum penetraverit, Antidotis Valentioribus expugnetur; nihil idcirco utilius excogitarunt veteres, scarificationibus & cucurbitularum applicatione, ferrum ignitum parti admotum suadet *Boylæus*, pulverem Pyrium desuper accendi vult *Lemeryus*; opem ferre possunt ligaturæ, suctiones, affricata axungia Viperina, vel caput ejusdem cruentum vulnere impositum, allium contusum applicatum, cujus esus utilissimus (a), coctæ Viperinæ carnes & comestæ (b), Oleum Olivarum quod pro certissimo ab Anglis celebratur Antidoto (c); conducunt Theriacalia, alexiteria, sudorifica; sed

(a) *Riverius* Cent. 4. Observ. 96.

(b) Confer. Thes. 2. Illust. *Imbert* pro Cathæd. vac. an. 1749. sunt qui virtutem diaphoreticam carni Viperæ denegant, ast perperam, & præter multa, retulit nuper *Clar. C...* Præticus hujus Urbis, se ab esu Viperarum, Anguillarum more conditarum, copiosè sudasse.

(c) *Vaterus* de novo Antidot. adv. Viper. mors. verùm *D. D. Geofrey & Hunauld* ab Acad. Paris. designati, ut id examinerent, post multa experimenta, nihil certi stabiliri posse pronuntiarunt vid. Act. Acad. 1737.

nullum, ex Observatis Illust. Bernardi de *Jeussieu*, alkali volatili, tum extus, tum intus adhibito, datur tutius certius que remedium.

3°. Aranei, duorum sunt generum, ex Naturæ Curiosis, vel biocculares vel octocculares, quorum plures dantur species, aliæ aliis Venenosiores: celebris est, ex octonoculari genere, Araneus, Tarentula dictus (a); frequens reperitur in Apuliâ, æstivis temporibus, urente præsertim caniculâ, insidias struit, & ore Venenato impetit, Hieme verò morsus, vel nullus, vel innocuus. A Tarentulâ demorssi, ictum persentiunt haud absimilem ei, quem Apis infligit, brevi tamen partem, circulus livescens, flavus, aut niger inficit, & inflammatorius exoritur tumor, nunc dolore, nunc verò stupore insigni stipatus; paucis à morfu elapsis horis, anxietatibus, dispnoeâ, cardialgiis, universi corporis debilitate, corripitur æger; tremor aliquandò artus occupat; interroganti, quid sentiat? nullum sæpius responsum præbet, aut moestâ inconditâque voce, necnon turbato vultu, pectus digito designat: hæc & alia à Baglivio in Tarantatis observata, non sunt ægrotantibus singulis communia, sed variant, pro Tarentularum naturâ (b), ægri temperie, & calore magis minusve urente, per æstatem quotannis solet morbus exasperari; notando quòd morbum, cæteroquin endemicum, quocumque iverint affecti, secum ferant (c); diuturnitate tamen temporis, & adhibitis adhibendis, curari solet.

Eadem in curatione Tarantismi usurpanda veniunt auxilia, quæ jam dum de Viperâ monuimus; verum, ex Authorum relatis, multum in paroxismo opitulatur Musica; auditis enim cytarhædis, sensim quasi redivivus, ad saltandum profilit æger, donec in largos sudores corruat, quiescit postea, & paucò elapso tempore, ad saltus denuò se accingit, quod quidem exercitium, per quatuor dies solet peragi, sicque alacrior evadit.

4°. Buffo Venenosus à Medicis censetur; hujus Venenum, mictu præsertim, cuti aspersum, deleteriam exserit vim, nisi pars statim urinâ vel aqua salsa abluatur.

5°. Scorpio animal est colore subatro, ex hujus imo corporis cauda producit, cujus extremo, aculeus recurvus & cavus, Venenum continens, adhæret. Innoxii sunt certis in regionibus, in calidiori-

(a) Sunt qui Morbum hunc in dubium revocant, verum vid. *Bagl. & Tozzi* Libr. I. P. 38. narrat de Militibus Hispanis, qui incolis ludentes, sese morderi passi sunt moxque gravissimis correpti symptomatis, periire. Vid. etiam *Brogiani* de Ven. Pag. 56.

(b) Ex *Baglivio*. Cap. 6. Pag. 615 alia producit symptomata, Tarentula sub albida; alia, stellata; alia tandem, uvæa, quæ posteriores, priori periculosiores.

(c) *Meyssonier* des Malad. extraord. & *Nouvel* P. 31. narrat se Novissè *Monspeli* Medicinæ Studiosum Tarentismi paroxismo correptum, qui per Musicam, Aquam vitæ, & Essentiam Roris Marini sanatus fuit.

bus vero Venenati, nostratium etiam ictus, periculosus non semel fuit observatus. Præsentissimum remedium est, Oleum in Scorpiones diu servati fuere, eoque vulnus illiniendum; ipse Scorpius contritus parti applicandus est, qui sibi ipsi egregium est medicamen; an virtute attractivâ? an vero alexiteriâ effectum suum præstet? peritioribus relinquimus disquirendum: Assam foetidam cum vino appositam celebrat Arnaldus noster Villanovanus; quæ jam memorata aliis prævalent Antidotis: conducunt intus Alexipharmaca.

6°. Cantharides, Muscæ sunt, coloris eleganter viridis, splendescens, & odoris foetidi. Venenatam ipsis inesse vim, plura sunt quæ demonstrent, cuti exterius admotæ, inflammant, vesicas excitant; nimiam dosi, eadem quæ intus sumptæ, non numquam procreant, renes scilicet & vesicam afficiunt, exulcerant, mictum cruentum, urinæ difficultatem, pruritum immanem in pudendis, Venerisque cient stimulum: quam virulentam Cantharidum naturam, pluribus luculenter adstruxit experimentis *Baglivius* (a), memorans, binos Canes, injectis in jugularem venam, unciiis duabus tincturæ Cantharidum, cum aquâ Cardui benedicti factæ, primò aquea & viscosa vomuisse, deindè humi cecidisse, vehementissimè sitiisse, alimenta respuisse, ac demum convulsos petiisse; in quorum aperto Cadavere, nigerri-mus sanguis & dissolutus, minimis veluti Olei guttulis perfusus apparuit, sanis de cæterò visceribus, exceptâ vesicâ urinariâ, in quâ nulla muscositas, quâ naturaliter obducitur, fuit reperta.

Assumptis Cantharidibus, danda est statim opera, ut è corpore ejiciantur; laudantur in hunc finem vomitoria, ex aquâ tepidâ & jusculis pinguibus; ut earum obtundatur acrimonia, largâ æger epotet copiâ lactici-niæ, Oleosa, mucilaginosâ; non neglectis clisteribus ex diluentibus & Oleosis; in vesicam injiciantur decocta emollientia; conducunt etiam semicupia; Camphora cum Oleo Amigd. dulc. soluta, pro egregio Cantharidum correctivo prædicatur (b).

VENENA MINERALIA.

1°. Mineralium Venenorum vehementissimum censetur, Mercurius Sublimatus corrosivus: nihil aliud est præparatio hæc, quam Mercurii vivi cum acido Salis Marini miscela (c): hoc assumpto lingua &

(a) Baglivi de usu & abusu Vesicant. Cap. 1. Exper. 1. & 2. Pag. 647.

(b) Groënveldt de tuto Canthar. usu inter. Verùm Fullerus in Pharm. domest. P. 36. id expertus pernegat.

(c) Adduntur in præparando Nitrum & Vitriolum, ut facilius succedat operatio, dum Salis parti alcalinæ adunantur, sicque acidum liberius factum, Mercurium faciliùs aggredi queat, sed nullum horumce cum Mercurio connubium.

& fauces exasperantur, exulcerantur, adsunt truculenta ventriculi & intestinorum tormina; viscidæ, spumosæ, cruentæque materies vomitu & alvo rejiciuntur, intolerabilis intus æstuat calor, sitis urget ardentissima, superveniunt deliquia, sudores frigidi, tendinum subsultus, convulsiones, brevi mors.

Veneno hocce domando, sæpius impar Medicina; admittendum statim est, ut vomitu concitato amandetur; largâ manu usurpanda veniunt, aqua præsertim, ex Sydenhamio, Oleum tepidum, Butyrum recens, julsula pingua; ad lenientia deinceps, lacticia, mucilaginosa recurrendum; opem etiam præstabunt, statim post assumptum Venenum, Alkalia fixa (a); quæ hætenus memorata, totum absolvent curationis scopum.

2°. Arsenicum est Sal volatile metallicum, cujus triplex rescensetur species, album scilicet seu Cristallinum, flavum & rubrum: è substantiâ quâdam cobaltum dictâ, sublimatione extrahuntur; potentissimè corrodunt, Cristallina præsertim: Venenis etiam meritò annumerantur, *Auripigmentum* & *Realgar*, quæ substantiæ sunt Arsenicalis propriæ. Intus varia hæc si sumantur, pessima creant symptomata, quæ lethiferam vitæ catastrophem, ut plurimum inducunt; si vero mors non derepentè subsequatur, Contumacissimi succedunt chronici affectus; ex quibus liquidò apparet, Arsenicalia è foro Medico esse excludenda, nam pejora malo, talia remedia censemus. Periculo non caret, externus Arsenicalium usus, & lethalibus infamatur exemplis (b). Opitulatur pingua, Oleosa, lacticia, mucilaginosa &c.

3°. Varia Mercurii præcipitata, Antimonialia quædam, acida Mineralia concentrata, Veneris non nulla præparata, item si ab æneo vase, in apparatus vel asservatos Cibos, Metallicum æruginosum quid migraverit, & similia, vulgò Venena audiunt, & intrâ corpus admissa, eadem excitare queunt, ac jam memoratum Sublimatum, eandem itaque curatoriam methodum exposcunt.

4°. Hujus non sunt Genii Saturnina, ut aliorum Venenorum more, citò perimant, etiam si paulò majori dosi ingerantur; repetita tamen si fuerit, minor etiam quantitas, lentâ morte jugulant, adeò ut plures sibi persuasum habeant, famosum illud Venenum, Pulverem successio- nis dictum, Saturninæ esse propriæ. Assumpto toxico, contumacissi- mæ sequuntur alvi adstrictiones, atrociora tormina, dolor in humeros,

[a] Incassum etiam datis vomitoriis, Olei Tartari per deliquium ope, sympto- mata mitigavit Kramerus. Observ. d'Edimb. T. 7. P. 42.

[b] Fernel. de Meth. Med. Lib. 6. Cap. 18. Hild. Cent. 6. Observ. 80. & 81. Sennert. Prat. Lib. 6. Part. 5. Cap. 2. Wepfer de Cicut. P. 289. Hoff. de Metallurg. Morbif. casum etiam refert Mead Tent. 4. P. 125. infantis, horrendis vomitibus & alvi dejectionibus perempti, cui leve capiti vulnus inflitum fuerat, pectus qui humescebat Oleo, in quo fuerat infusum Arsenicum.

dorsum, lumbos oberrans; vomitus; postea paræses, contracturæ, asthmata, lentæ febres, quæ, communia apud eos qui plumbum quomodocumque tractant, aut si Vina Lithargiro adulterata, epotentur; unde ex Boerrhaviimonito (a), caveant Venenum, quod odore & sapore carens, tanto pejus afficit, quo irrepsit tectius, nec se manifestat nisi in devictis jam corporibus.

Duplex apud scriptores proponitur curatoria methodus (b); alii diluentia, emollientia, oleosa, lacticinia, semicupia & vomitoria, non nisi cautissimâ manu, propinanda suadent; alii verò, quibus adstipulamur, ut causa materialis morbi facilius averruncetur, vomitoria, inter quæ primitias tenet, Vitrum Antimonii Saccharo mitigatum, purgantia stimulantia & acria, Opiata, sudorifica & cardiaca mirum opitulari perhibent. Breviter nunc ad

VENENA VEGETABILIA.

1°. Tristibus & innumeris exemplis, virulenta Cicutæ comprobatur indoles; ex hujus succo occubuisse Socratem, fidem faciunt Historiæ (c); in his tamen regionibus magis, in aliis verò minus exitialis est. Intus si sumantur folia, radices, semina, vel succus Cicutæ (d), pessimi memorantur effectus, de quibus egregius Wepferi consulendus tractatus. Valent largâ manu propinata mitiora vomitoria. (e), Oleosa, lacticinia, æremata emollientia, & si purgantibus necessum sit, blandis tantum & minorativis est utendum: sic è ventriculo & intestinis, ex toto, vel maximâ ex parte propulso Veneno, pro præsentissimo deinde laudatur, largus Vini generosi potus (f).

Eadem de Napello Vegetantium venenorum ocysissimo, & de purgantibus quibusdam mochlicis dictis, intellecta volumus.

2°. Inter Venena locum tuentur Fungi, quorum numerosæ species, formâ, colorum diversitate, & qualitate inter se distinctæ (g): etsi

(a) Chem. T. 2. Proc. 171. P. 288.

(b) Vid. quoad primam tract. Famig. Tronchin de Colica Picton. & quad secundam hujus Examen Auct. Med. Paris.

(c) *Publica pœna reis hæc esse solebat Athenis,*

Hæc sumptâ, magnus Socrates fuit exanimatus

Æmilius Macer Lib. de Herb. virtut. Cap. de Cicutâ.

(d) E solo foliorum olfactu, ebrietatem & stupiditatem se expertum fuisse, testatur Boerrhavius Hist. Plant. Hort. Lugd. Batav. P. 93.

(e) Mitia si sint invita fortiora suadet Wepferus Pag. 323. & Haller. in Boerrh. N°. 1138 octo pueros memorat, qui vomituriabant & convellebantur ex esu Cicutæ, propinato Vitriolo albo, sanatos.

(f) Id suadent innumeri Practici de quibus vid. Henr. à Brâ Lib. 2. Cap. 10. de Med. advers. Ven.

(g) Tournefort Hist. Acad. Paris. 1707.

quidam in eduliis usurpentur, omnes tamen noxam corpori inferre queunt, unde Seneca, Fungos voluptuarium Venenum nominavit, & Plinius, cibum ancipitem illos voluit: gravissima producantur, mors ipsamet, si species Venenatæ dictæ comedantur (a), ut plurimis fide dignis observationibus liquet, & ferè quotannis in hac Urbe tristi confirmatur eventu. Opitulantiæ remedia sunt, Aqua tepida, Oleum Olivarum, Amygdalarum dulcium, Acetum, Butyrum insulsum liquatum (quo solo plures sanatos vidimus) Mel, aliaque hujusmodi.

3°. Opium succus est Gummeoresinosus, è capitibus Papaverum hortensium incisus, expressivè emanans, nigricans, mollis, saporis amaricantis, odoris gravis & virosi. Etiam si in praxi quotidie experiamur, Opium debitâ dosi exhibitum, vix alio medicamento, præstantissimis suis effectibus, Palmam concedere, & pro heroïco habendum esse; in dosi tamen largiori assumptum, Venenum evadere, nemini non notum est; promiscuus idcirco & profusus ejus usus, Cane pejus & angue vitandus: missis omnibus, quæ Opium ut egregium medicamen spectant, hoc tanquam Venenum intueamur; sufficiens copia ut tale dici queat, ritè determinari non potest, hujus enim effectus pro consuetudine (b), Ætate, temperamentorum diversitate, multum variant.

Plures memorantur effectus Opii nimiam dosi assumpti, quos vetant rescensere, strictiores Dissertatiunculæ Cancelli; notando, hos sat apprimè consonare cum Vini effectibus, *Vinum enim inquit Angelus Sala, (c), abusu phrenitidem, maniam, stupiditatem aliosque detestandos affectus, temporis successione parit, non minus quam Opium.* Auxilia sunt, venæ sectiones, vomitoria, clisteres acriores, vesicantia, Haustus Vini veteris, Castoreum, quod optimum; censetur Opii correctivum, ex *Galeno, Mercuriali, Heurnio, Foresto* acida inter quæ acetum, succus Citri, Spiritus Vitrioli, aut Sulphuris &c.

Hæc quæ jam, dicta sunt de plantis quibusdam narcoticis, quales sunt Hiosciamus, niger præsertim, Solani species quædam, Mandragora, Stramonium, aliæque.

Antequam manum de tabulâ, pauca de Venenatis quibusdam halitibus, supersunt proponenda. Mortiferi è terrâ erumpunt va-

faj Ex solo interdum odore, subitæ mortis causam extitisse, narrat Forestus Lib. 10. Obser. 116. & Hildanus pessima memorat symptomata, cuidam, qui manibus tantum Fungos versabat, accidisse.

faj Quanta sit consuetudinis vis, patet & Turcarum exemplo, qui trium etiam dragmarum pondere, Opium, una dosi, assumere non verentur, & hujus usu ad Martis, venerisque pericula paratiora fieri asserunt.

faj Opiologia Cap. 3. P. 531. vid. etiam Mead Tent. 5. P. 135. & Geoffroy Mat. Med. T. 3. P. 693.

pores, qui mephites dicuntur; hos inter famosissima est Neapolitana Spelunca, ab indigenis *Grotta del Cane* nominata, è quâ fumosa, tenuis, sensilis tamen, emergit aura: in hujus fundum, Canes vel alia viva Animalia immissa, anhæla statim in convulsivos motus, prostratis tandem viribus, in deliquium moribunda decidunt, & si longior sit mora, irremeabile sequitur fatum. Cryptam haud absimilem observare datur, in pago ab Urbe hæc non distante, qui dicitur *Perols*, in quo pluribus tentatis experimentis, eadem, ac in Speluncâ Neapolitanâ, observavit Phænomena merit. Prof. (a). Idem etiam, ex observatis jam laudati viri, lethiferum Gas continent, sepulchreta.

E virulentis etiam & valdè infensis exhalationibus habendæ sunt, eæ quæ ex Carbonibus, in conclavi clauso & angusto accensis, in aëra feruntur; eo quod gravem non modo noxam, sed & celeritèr necem, & hominibus & animantibus inferre queant, de quibus fidem faciunt Medicorum monumenta (b): noto etiam notius est quam lethiferi sint vapores, qui è fodinis metallicis, aliisve subterraneis locis, nec non è cellis musto fermentante repletis, exhalantur.

In eo consistit curationis scopus, ut ægri statim aëri libero, sereno, ac temperato exponantur, aquâ frigidâ facies perfundatur; irritandæ dein sunt partes, suadet in hunc finem Hoffmannus, ut tota pectoris regio pedes & brachia, pannis asperioribus fricentur; secunda postea venit vena, Salia interim volatilia, in os & nares infundantur, vel etiam aquâ vehiculi loco propinentur; aër de industriâ in nares & os immitatur, vel folle, velsi vir quidam robustus, in os ægrotantis, totis viribus insufflet, hoc artificio, memorant Acta Edimburgensia, virum pro mortuo habitum, sanitatem recuperasse; quæ breviter exarata, sufficiant; de aliis auxiliis, varii sunt Scriptores consulendi.

Brevi quidè folio, vastam hanc Venenorum historiam pestringere ausi, plures adhuc ampliaciones, expetere videtur proposita disquisitione; nec nos latet scriptores non nullos, alia plura in Venenorum albo contineri, existimasse; verùm hic ingenuè fatebimur (quod nobis, an vitiotribuendum sit? an laudi? statuent, penès quos causæ nostræ judicium fuerit) rem copiosissimam, vires & tempus excessisse.

QUÆSTIO

(a) Act. Acad. Monsp. 1743.

(b) Marcel Donat. Hist. mirab. P. 107. Forestus Lib. 9. Obser. Act. Acad. Paris. 1710. Lancisi de sub. mort. Lib. 1. Cap. 6. Observ. 2. Ramazzini Suplem. Diatrib. de Morbis artif. Diarium Med. mens. August. 1760. Hoffmannus passim.



QUÆSTIO QUARTA.

De Scorbuto.

SCORBUTUS, teter affectus, numerosa morborum ac symptomatum catervâ comitatus, numquàm idem, sed proteiformis, facies semper variare assuescit, cum modò capitis, modò thoracis labes, nunc abdominis vitia, & nunc corporis totius, morbos ostentare nitatur, verè malorum ilias, omnibus flebilis, describi potius, quam deffiniri amat.

Morbus hic veteribus haud ignotus, alio licet sub nomine, accolis Septentrionalibus Maritimis endemicus, hæreditarius non numquam, contagiosus (a), variis stipatur symptomatibus, & sub variâ incedit larvâ & signis, quorum alia in his, alia verò in aliis observantur, neque enim omnia, in omnes indifferenter cadunt; hæc præcipua ab Authoribus solent numerari: incipiente morbo, gravitas & insolita lassitudo, totum occupant corpus; faciei color à naturali recedit, plumbeus plerumque fit; accedunt dein gingivarum tumor, mollities, cruentatio, livor, erosio; nigrescunt dentes, denudantur, dolent, vaccillant, decidunt; crura nunc intemescunt, nunc extenuantur, emergunt in iisdem macculæ diversæ figuræ, magnitudinis & coloris, quæ nonnumquam in femoribus & toto corpore sparsim efflorescunt, quæque sæpius, in ulcera mali moris degenerant; lancinantes miserum fatigant dolores, modò fixi, modò erratici, dira ventrem cruciant tormina, languet appetitus & prosternitur, urinæ minguntur initio citrinæ quandòque & tennes, quandòque crassæ & albidæ, verum crescente morbo, rubescentes, fuscæ, putridæ, Arenulis rubris & friabilibus, in imâ parte subsidentibus; pulsus parvus fit, debilis & inæqualis, adsunt pertinaces vigilæ, oris fætor intolerabilis, dispnæa, sudores frigidi, crebræ hæmorrhagiæ, syncopes, aliaque sexcenta, pro partis affectæ diversitate.

Molles non tantum partes, ossa etiam infestare Scorbutum, plura

f a J Hunc contagiosum esse, & à nutrice in filiolum, lacte instillatum fuisse, lugubri experientiâ observavit Dolæus Encyclop. Med. Dogm. Lib. 3. Cap. 12. à solo etiam Fœtore Cadaverum, Scorbuto defunctorum, ortum hujus mali annotavit Sennertus.

docent observata (a), hinc exostoses, caries, Spinæ ventosæ; hinc nulla, aut saltem difficilis fracturarum consolidatio, dum labe Scorbuticâ inficitur medulla (b).

Scorbutus, morbus sanè cachecticus, morbi ut plurimum chronici, quandoque acuti, sapit indolem; in hoc tota invertitur sanguinis crasis, solidorumque compages labefactatur; globuli namque purpurei coacervati, innatant fero, acrimoniâ muriaticâ præprimis, nonnumquam alkalina, imò (sed rarò) acidâ referto, unâ cum partibus lymphaticis crassis & viscidis, serum acre, plus, minusvè irriterientibus; dum solida laxa & flaccida in primo stadio, in ultimo verò tenuia & quasi semierosa sæpè manifestantur. Ad hanc tum fluidorum, tum solidorum labem multum conferunt, vita deses ac sedentaria (c), moeror, aër crassus & uliginosus, alimenta salsa, fumo indurata, farinacea, viscida; vegetantium defectus, aquarum putridarum & stagnantium potus, spirituum ardentium, aut liquorum minus defæcatorum usus &c. nam solida debilitando viscositatem ac lentorem fluidis conciliando, acrimoniamque in variis variam impertiendo, causam præbent Scorbuti proximam continentem.

Recens Scorbutus, nullique prævio adscitus morbo, non adeò periculosus & chronicorum numero adscribendus, idem tenendum dum acrimonia muriatica, aut acidâ est, & viscositas ac lentor ei prævalent; periculosior econtrâ, ac peracutus est habendus, dum inveteratus, aliorum morborum comes est, & dum acrimonia, alkalina præsertim, major est, lentore & viscositate fluidorum: à parentum labe contractus, quique ab incunabulis adolevit, ægrè admodum fugatur, fieri quippè vix potest, quin aliquod sui vestigium relinquat, levique in victu errore repullulat: quid plura? quò graviora, aut leviora, comitantur accidentia, eò felicior, aut infeliciorem decet occinere prognosim.

Non unam & eandem esse Scorbuti therapeiam, edocent clinicorum observata, ejusque comprobata æthiologia; varia requiritur medela in incipiente, confirmato, in muriatico, acido, vel alkalino: ut itaque congruis auxiliis possit debellari, attendendum prius, num fluidorum lentor, major sit acrimoniâ, & quænam acrimoniæ indo-

sa J Observavit Clar. Petit Malad. des Os T. 2. Pag. 446 quod in Scorbuticorum Cadaveribus, inventum fuerit periosteum, ab omnibus ferè corporis partibus secessisse. Poupert Act. Acad. Paris. 1699. se vidisse testatur, epiphyses ab ossis reliquo corpore separatas, costas à cartilaginibus sejunctas & cariosas, cellulosa ossium internam fabricam in putrilagineam conversam &c. & Wansvieten magnam partem maxillæ ossæ corruptam excidisse vidit T. 3. P. 607.

sbj Illus. Wansvieten T. 3. de Scorbuto.

scj Undè pessimè sanitati suæ consulant eruditi, dum ad libros anxie sedent, & Musarum sacris, noctes atque dies operantur.

les; notando tamen in omni Scorbuti specie, inchoandam esse curam, saburram in primis viis nidulantem amandando, tonumque ventriculi & intestinorum roborando: in incipiente Scorbuto, purgantia majoris, minorisve energiae, pro diversa ægrotantis constitutione, varioque corporis statu cachectico, veniunt identidem exhibenda, simulque sub diversa formulâ, interponenda remedia antiscorbutica propriè dicta, *Nasturtium* nempe, *Cochlearia*, *Beccabunga*, *Eruca*, *Lupulus*, *Raphanus*, *Famaria*, *Cortex Winteranus* &c. quæ amaritie, ac vi attenuanti & diureticâ calidâ, quâ pollent, solidis robur conciliant, attenuant fluida, acrimoniam extricant & per urinæ colatoria eliminant.

Verùm si provectior sit morbus, & lentori prævalere acrimoniam, suadeant Phænomena; tunc, si muriatica, præstò sunt diluentia, edulcorantia, nunc sola, nunc antiscorbuticorum supra memoratorum virtute, acuata; aquarum medicatarum lacti recenti permixtarum, largus ab Hoffmanno commendatur usus: dum verò alkalina est acrimonia, nocent antiscorbutica vulgò dicta, nisi maximâ acetosæ copiâ admixta fuerint (a); prosunt mirificè, fructus horæi subacidi, aut acido-dulces; succi Limonum, Aurantiumve (b), serum Lactis, Cremore Tartari extractum, lac dein ebutiratum (c) & similia, quibus tota adimplebitur Scorbuti Medicina: tandem si acida fuerit, jam dictis antiscorbuticis & alkalinis variis utendum, horumque usui interponenda esse laxantia, existimat Schachtius.

Dum his debellatur auxiliis fluidorum labes Scorbutica, externis symptomatibus, gravissimis sæpè, sublevandis, operam navare debet Medicus; his autem efficaciter opitulantur, nunc scarificationes, nunc lotiones, antiphlogisticæ, antiscorbuticæ, antisepticæ, diversæ Scorbuti speciei appropriatæ.

(a) Wanfvieten de Scorbuto. Schacht. de Scorbuto.

(b) Afferit Lister. de Scorb. se ex nullo alio medicamento simplici, tot felices effectus in praxi observasse, quam ex Limonibus.

(c) Consul. Etmullerus, Willisius, Charletonius, Eugalenus, Brunnerus, Brucæus, Pitcarnius, Wanfvieten &c. solo ferè renuente Morthon. Qui credit Pag. 87. Tom. 1. diætam lacteam Scorbuticis inimicam esse.



QUÆSTIO QUINTA.

Quænam Venena in usus Medicos verti possint ?

QUÆCUMQUE aut cibo, aut morfu, puncturâve, aut contactu, aut halitu, minimâ mole, viventi corpori inferta, mortem velocissimè ut plurimum, vel gravissimos excitant morbos, Venenorum nomine donanda esse, jam in prægressis indigitavimus. Notavimus dein, quod licet quædam in usus Medicos verti possint, non exindè tamen è Venenorum albo, sint excludenda; Venena namquè Medicinalia evadere, & miros præstare effectus, sive interno usu, sive externo, modò peritâ manu tractentur, percelebrium Scriptorum testantur monumenta. Jam verò ut demandatus absolvatur scopus, quænam hæc sint, proponere consultum duximus.

1°. Hæc inter, meritò locum tenet Mercurius Sublimatus corrosivus: potentissimum illud toxicum, Cane pejus & angue vitandum, existimaverant Medici benè multi; hoc solus ferè, nunquam satis laudandus Boerrhavius, Aquâ dilutum, Sirupo Violaceo edulcoratum, dosi exiguissimâ, ad octavam scilicet grani partem, bis terve de die repetendâ, in casibus quibusdam desperatis, multum opitulari asseruerat (a); præceptoris sui vestigiis, propero pede inhærens Illustr. Wansvieten, infinitis fultus observatis, egregium in Venereis morbis debellandis fieri medicamen, jurè pronuntiare ausus est: hanc sic instituit parandi methodum.

Solvatur Mercurius sublimatus, in spiritu Frumenti rectificato (b), hæc lege, ut in singulis spiritus unciis, hæreat dimidium grani, detur deindè, manè & vesperî, Cochlear ægrotanti, vel ad summum duo; verum suadet Clar. De Haën observatorum Wansvietenii testis occultatissimus, si pertinax sit malum, & robusto de cæterò donetur temperamento ægrotans, ut ter, imò quater de die offeratur (c): epotet simul largam hordei, vel alterius cujuscumque decocti emollientis, cum certâ lactis quantitate copiam.

Quoad

(a) Instit. Chem. T. 2. P. 312.

(b) Spiritus ex quocumque Vegetabili, fermentatione parati & rectificati, nihil ferè differunt inter se, & loco spiritus Frumenti usurpari possunt. Vid. Joan. Bona Hist. Curat. pag. 9.

(c) De Haën ratio medendi T. 2. P. 209.

Quoad secretiones, quæ hoc assumpto medicamine cientur, notat Clar. Bona, in Libello de hujus efficaciâ conscripto, alvi quandam dejectionem, primis diebus observari; dein verò remedio sensim assuefactis, ventriculo & intestinis, diuresis tantum, vel sudores promoventur: notatu prætereà dignissimum censet, quod cum è familiarissimis Mercurialium effectibus, sit salivatio, hanc numquam à Sublimato, concitatum observaverit; aderat solum, levis quædam interdum sputi promotio, quæ brevi per se cessabat. Refert tandem, non in solis Venereis morbis, pro heroico habendum esse remedium hocce, multum etiam præstare aliis in affectibus, de quibus consuli meretur jam memoratus Libellus. Noto etiam notius est, his qui vix primis, ut vulgò dicitur, labris Chemicam artem degustarunt, ex Sublimato corrosivo, Mercurium addendo, & iterum Sublimando, confici Mercurium dulcem, cujus usus in praxi egregius.

2°. Non in solo Sublimato, ad contumaciores profligandos morbos, præstans remedium reperire datur; Cicutæ major, pro Veneno meritò habita, faventibus nunc Clar. Storck Medici Viennensis observatis, præsentissimum plurium morborum, suppeditat medicamen (a). Extus si usurpetur, egregiè resolvit, gangrenæ progressus retardat, podagricos, rheumaticos, carcinomatodeos dolores demulcet &c. his per propria experimenta fretus veritatibus, vitam pro nihilo reputans, modò publicæ utilitati inserviret, succum expressum, extracti formâ, in semetipso tentare ausus est, auctâ sensim in dies dosi, quibus innoxie peractis, Pillularum sequentem formulam promulgavit. Sumatur Cicutæ recentis certa quantitas, exprimatur succus, leni igne in vase terreo evaporetur, ad consistentiam extracti, materiam identidem agitando, tunc cum foliis ejusdem Plantæ pulveratis, fiant Pillulæ, ad pondus duorum granorum, harum unam, manè & serò, præscribit jam prælaudatus vir, dosi sensim in dies ad scrupulum auctâ. Nec urinas, nec vomitum, nec secessum movet remedium illud; omni sexui, ætati, temperamento, observatis observandis, competit; opitulatur cancris, skirris, scrophulis, fistulis, tumoribus œdematosis, ulceribus contumacioribus &c.


3°. Quæ jam de Cicutâ notavimus, ad Belladonam, toxicum vegetabile, refferri possunt; Cancrum enim mammarium, per foliorum

(a) Storck Cicutæ Libel. dantur etiam quidam inter veteres, qui Cicutam intus usurpare non reformidarunt; sic Etmullerus in Schroder. P. 111. novisse aliquem asserit, qui skirros lienis & hepatis, per radicem Cicutæ propinatam, curabat. Renealmus Obs. 3. Cicutæ scrupulos duos, Vino infusos, in hepatis obstructione præscripsit. Refert etiam Wepfer. de Cicut. P. 309. D. Velsch arcana Cicutæ, experimentis nobilitata, ad gravissimos affectus sublevandos plurima habuisse.

usum internum, sanatum memorant Clar. Lambergen & Darluc (a); miros etiam hujus decocti effectus vidisse, testatur Junkerus. (b)

4°. Vitrum Antimonii, vehementissimum Emeticum, hominibus Venenum, Animalibus non item, quibus non nisi anxios motus vomitusque procreat (c). Sicut ex Antimonio, vita & mors, prò vario præparationis modo eliciuntur, ità medicamen aliquod salutiferum sistitur, ex Antimoniali Veneno: formula ejus sic se habet. In Cochleari ferreo, in fluxum redigatur Cerae citrinæ drachma una, fluenti, miscetur Vitri Antimonii in pollinem redacti, uncia una, per semihorium detineatur, super lentum sine flammâ ignem, & spatulâ agitur, remotum ab igne, fiat pulvis in usum servandus, Vitrum Antimonii ceratum vulgò dictus. Egregiè conducit, in Cholicis præsertim Saturuinis, Pictonum nuncupatis.

5°. Nec nos latet, plura alia dari, pro Venenis meritò habita, quæ modò debitè usurpentur, inter præstantiores Medicinas locum tumentur, qualia rescensentur, purgantia mochlica dicta; Cantharides, quarum usus certis in circumstantiis multum eximius; acida mineralia aquâ diluta; Plantæ quædam narcoticæ, ut Hiosciamus, Solani species quædam, aliaque. Quoad verò Arsenicum, etiamsi à quibusdam Scriptoribus celebretur, hujus tamen usum, cum saniori clinicorum parte, exulandum esse censemus. Tandem apud omnes in confesso est, Opium, paulò altiori dosi Venenum, debitè & strenuâ manu tractatum, vix ullo alio medicamento, præstantissimis suis effectibus, palmam concedere.



QUÆSTIO SEXTA.

An facultatum & virium Theoria à neotericis meritò rejecta?

FACULTAS, vis, potentia, virtus, idè sonant apud veteres (d): his vocibus, tota perstrebat olim Medicina, & in vastis illius ævi voluminibus, de his perpetua fit mentio: facultas, Galeno, id est quod primò actionis causa existit (e).

(a) Vid. Diar. Med. mens. Mart. 1757 & Decemb. 1759.

(b) Junker Consp. Therap. Tab. 19. de his etiam legi merentur, quæ protulit sagaciss. Amoureux, dulci cujus amicitia fruor, in Diar. Jul. 1760.

(c) Sproëgelius Dissert. inaug. de Experim. in Animal. instit.

(d) Vid. Varanda Physiolog. Cap. de facult. & functio. P. 69.

(e) Galenus Lib. 1. de simpt. caus. Cap. 1.


Variae corporis actiones, inquit Riverius noster, ab animâ exercentur, per potentias & proprietates diversas, quæ illius essentiam proximè sequuntur, ab eâque immediatè dependent, quæ proprietatum, & facultatum nomine donantur (a): addit deinceps facultates à functionibus dependere, tamquàm effectus à suis causis, in hoc autem discrepare statuit, quod facultas animæ sit propria, functio verò toti composito: contendit tandem, quod ut actio exerceri queat, requiratur non tantùm, ut anima suis stipetur facultatibus, verùm recta etiam organi ad agendum dispositio, quo malè se habente, actiones vel depravatè peraguntur, vel nullo modo exercentur.

Trifariam facultates diviserunt veteres, in naturales nimirum, vitales & animales, quas iterum variis aliis subdivisionibus objecere. 1°. Naturalem facultatem vocant eam, quâ actiones ad individui, vel speciei conservationem spectantes, eliciuntur; huic famulantur nutrix, auctrix, generatrix; per nutricem hanc audiebant animæ vim, quâ alimentum, corporis substantiæ assimilatur, ut deperditum reparetur; auctrix illa dicebatur, quâ corpus incrementum assumit; generatrix tandem, quâ homo sibi similem efformat: harum prior rursus dividitur, in attractricem, retentricem; concoctricem, expultricem; posterior verò in alteratricem & conformatricem. 2°. Facultatem vitalem dixere, quâ pulsus fit, calor propagatur per universum corpus, & respiratio absolvitur; per hanc vita in corpore conservatur, absque hac celebrari non potest. 3°. Animalem nuncuparunt facultatem, perquam sentimus & movemus, hanc dividebat Galenus, in sensibilem, motivam, & rectricem, quarum unaquæque de novò, suas patiebatur subdivisiones: quasdam filemus à scriptoribus non nullis recensitas, cum ad jam exaratas, facile referri queant.

His jam memoratis facultatibus, fulciebatur antiquorum Theoria, quæ per plures annorum myriades viguit, quæque jam sua videtur habuisse fata: paucis perpendamus nunc, utrum Theoria hæc, à neotericis, jure ac meritò fuerit rejecta. Si facultatum & virium vocabula, quibus indiscriminatim non semel, usi sunt veteres, harumque divisiones & subdivisiones, statim in limine intueamur, hos entia sine necessitate multiplicasse, & verba nihil ferè significantia, adhibuisse non numquàm, reperiemus: verùm ne cæco novitatis & præjudicatarum opinionum furore fascinati, veteres increpemus, qui si non omnia vera, plurima certè verissima proponunt.

Quid plura? si perlustrentur, percelebrium quorundam Physiologorum, è neotericis monumenta, nonne mutatis tantum nominibus, & sub clariori tantum luce, à veteribus celebrata, pro veræ Theoriæ inconcussis dogmatibus venditantur? nonne adhucdum etiam, apud nonnullos perennatur, functionum divisio, in naturales, vitales & animales? tandem quamvis mira promittant, & cantilent, de suis Theoriis neoterici, non magis veris forsan superbimus commodis, quam quæ, ex facultatibus & qualitatibus antiquorum expectantur; quæ si explicatæ, & rationibus quibusdam fuissent innixæ, ut antiquis, praxis decori est, sic & illis laudi Theoria esset. Unde concludendum esse existimamus.

Facultatum & virium Theoriam non meritò à neotericis fuisse rejectam.



QUÆSTIO SEPTIMA.

An quorundam chronicorum in acutos Morbos transformationem spontaneam quandòque salutarem, arte liceat imitari.

DUO complectitur Quæstio hæc, quorum aliud, tamquam certum supponi debet, & de quo lis nulla movenda videtur; aliud verò, disceptationis materies, tamquam problematicum proponitur, ut libratis rationibus, sententiæ assentiamur, quæ magis fulta, & clinicorum observationi consona videbitur.

Quot & quantis morbis, obnoxium sit Corpus humanum, quot & quam furentibus, per universalem vitæ curriculum, jactetur procellis, vix leviter attendenti perspicuum est. Verùm si multi sint vitalis auræ exitus, innumeri dantur regressus ad sanitatem: cum enim creatus fuerat homo non periturus, in se condit vitæ semina, ita ut inter ipsamet necis pericula, ad vitam videatur ordinatus, & gravius etiam ægrotans, innato sibi vitali principio, mille modis ad sanitatem tendat.

Mirabilis etenim illa Machinæ humanæ structura, liquidorum solidorumve

Idorumve motus reciproci, tantus organorum secretoriorum, ac emissariorum ductuum apparatus, tot sunt arma quorum ope, in omni morbo, fit naturæ conamen, quo hostiles succos vel emendet, vel eliminet; hinc tot & tam variæ crises, tot & tam diversæ *Metaftases*, tot & tam inopinatæ morborum solutiones, quas, [si cum bonis ægrotantium rebus succedant] tot salutes morbos dixeris, in quibus annuendis, imò & non numquam provocandis, non modò versatur medentis industria, quam in illis avertendis, nefas & piaculum foret; morbus quippè fit aliquandò morbi sanatio.

Natura interdum salutem ægrotantis moliens, victoriæ prorsus impar, effœtis viribus, vincitur ipsamet; hinc cujuslibet morbi, ex observationibus, triplex exitus; 1^o. Ad sanitatem. 2^o. Ad alium morbum graviolem aut leviolem per *Metaftasim* (a), 3^o. Demum & quidem infelicitè ad mortem. Dum autem primo & feliciore exitu Beari nequit æger, nec sub tertio lethali occumbit, felicem se fateatur, si devictâ mortis falce, secundo gaudeat morbi eventu, quâ salutarî *Metaftasi*, ab exitiali morbo liberatus, in mitiorem alium inciderit.

Mutationem Morborum chronicorum in acutos spontaneam existere posse in Corpore humano, nemo non concedere debet; erit adeoque transformatio hæc salutaris, cujus solutio, remedium affert alteri morbo; ita tamen ut status inde corporis ortus, priori non sit periculosior; de his fidem faciunt observatorum monumenta, idque non secus reperire datur, in plurimis morborum judicationibus; ad hunc finem, teste experienciâ & observante divo Hypocrate, longo alvi profluvio detento, spontè superveniens vomitus morbum solvit (b); si à leucoplegmatiâ detento, vehemens diarrhœa superveniat, à morbo liberatur (c), &c. ita non semel notarunt observatores, in cachecticis, vel etiam in hydropticis, accessu febris intermittentis, morbos evanuisse, quod etiam semel vidisse testor: notatu pariter dignissima videtur Boerrhavii observatio, à Wansvieteno relata (d), de factore, ter paralyti correpto, & toties febre magnâ superveniente sanato. Plura vetant effari angustiores dissertatiunculæ & temporis limites, de quibus passim consulenda clinicorum volumina.

Hâc methodo naturæ medicatricis ritè perspectâ, Medicus tamquam illius minister & interpretes, facîle, atquè absquè errandi metu,

faj *Metaftasis* dicitur, translatio subitanea materiæ morbificæ à parte in partem, à naturæ conatu procedens Path. Meth. Illus. Sauvages P. 399.


fbi Hypocrates Sect. 6. Aph. 15.

fci Id. Sect. 7. Aph. 29.

fdi Wansvieten Comment. in Aph. Boerrh. T. 3. P. 273.

varios ejus motus, sedulo perpendere debet, & determinare poterit quando illam vel sequi, vel aliam in medendo viam eligere debeat; cujus rei præclara jam prostant specimina apud Hypocratem, Galenum, aliosque Medicinæ antistites; quod verò hanc arte imitari liceat, nulla, quod sciam, reperiuntur observata apud Scriptores, quibus hoc, cum bonis ægri rebus, fuisse tentatum constet; huic que præcisè adversari videtur veterum doctrina, qui certi, quod hæc imposita fuerit naturæ necessitas, ut totis viribus in morbidæ materie subactionem, & ad incernicula propulsionem contendat; hanc tantum adjuvandam, & hujus motus exequendos esse autumarunt. Sistat igitur pedem Medicus, sagax naturæ speculator, ne Scillam vitare cupiens, incidat in Charybdim. Idcirco concludendum esse credimus, quod

Quorundam chronicorum Morborum in acutos transformationem spontaneam, quandoque salutarem, arte non liceat imitari.



QUÆSTIO OCTAVA.

An frigus Febrile differat à frigore syncoptico?

FRIGUS, juxta Illustr. Wansvieten, nostri respectu, nihil aliud est præter sensationem, quam ex imminuto calore corporis nostri, percipimus (a): debet igitur concitari perceptio hæc, dum minuuntur causæ, calorem in humano corpore producentes. Ab attritu liquorum in se mutuo & in vasa, calorem pendere, nullus fermè inficiabitur, qui quidem debetur fluidorum motui circulatorio; si igitur motus is imminuatur, frigoris sensum debere subsequi consequens est.

Ingruentibus Febribus continuis & intermittentibus, manifestatur ut plurimum frigus, sicut & in exordio Febrilium exacerbationum. Varia & multiplicia hujus invasionem præcedere & comitari solent phænomena; corporis namque lassitudo, gravitas, anxietatis sensus, miserum fatigant ægrotantem; pulsus parvus fit, frequens, non raro tremulus & inæqualis; pallefcunt imò non semel livefcunt ungues, labia, vultus & reliquæ totius corporis partes; dein inhorefcit cutis,

(a) Wansvieten in Aphor. Boerhav. T. 2. P. 159.

rigescit, horripilatur; contremiscunt non numquam & convelluntur membra, quæ motitationes, tantâ vi aliquandò in maxillâ inferiori apparent, ut magno cum strepitu, dentes collidantur.

Non hæc sola, ex frigore Febrili oriuntur; notabiliter imminuitur, vel penitus sufflaminatur perspiratio, urinæ tenuiores, parvæ & aqueæ minguntur, &c. quæ brevitati consulentes, silentio premimus: nonnumquam si diutius protrahatur, notante Illustr. Wansvieten, stupidi jacent ægrotantes, imò tanta insensibilitas observatur, ut pedes ad ossa usquè, miseris combusti fuerint, absque vel minimo doloris sensu: quid plura? cum Pulmo, continuo fluenti sanguini objiciatur, non secus ac cæteræ partes; hinc sæviente frigore Febrili, non debite expanduntur vesiculæ aëreæ, difficilius progrediuntur liquida, in vasis suis stagnant & coacervantur, undè non mirum, si fato non semel occumbant ægrotantes, & si post mortem, sanguine crasso, nigro & poliposo infarcti Pulmones reperiantur (a): hæc hætenus memorata accidentia, pro intensitate Febrilis frigoris, varia occurrunt.

Febrile frigus debetur stagnationi & spissitudini sanguinis, cujus adventu circulatorius imminuitur motus, & consequenter ponitur frigus. Non reticendum tamèn, præter memoratam, aliam affectus hujusce causam assignari posse, cum nempe inspissato sanguine, & in minimis vasculis lentescente, nerveæ succutiuntur fibrillæ, tanquam à corporibus frigoriferis, ut excogitavit famigeratissimus hujusce lycei Professor (b); unde fiat quod sensu molesto, anxioso, & dolorifico conquerantur febricitantes, id in dies docente observatione.

Frigus verò syncopticum, absquè ullo molestiæ sensu manifestatur, nam præceps fit in syncope, virium collapsus; hoc in statu; ad sensum quasi abolentur omnes functiones, & flacciditate quasi paralitodæa detinentur muscoli, hinc ratione symptomatum, frigus utrumque concomitantium, discrimen aliquod interesse videtur: ast cum ab eadem causâ continente, nempe ab imminuto motu sanguinis circulatorio, utrumque originem trahat, facile concludi posset, Febrile, à syncoptico nullatenus differre: anceps itaque videri debet hujusce problematis judicium; verumtamen si attendatur, sive ad naturam frigoris utriusque, sive ad causam immediatam, & prætereà frigus Febrile, fieri sæpissimè syncopticum, jure quodam concludendum esse autumamus.

Frigus Febrile vix differre à frigore syncoptico.

(a) Wansvieten T. 2. P. 162. Vid. etiam, quæ profert merit. Author anonymus de recond. Febr. interm. naturâ Cap. 6. P. 28.

(b) Illustr. Fizes in Tract. de Febribus Cap. 5. Pag. 69.

QUÆSTIO NONA.

De Aëre, Aquis, & Locis subMonspeliensibus.

INTER varia, quæ vitæ & animantium sanitati, maximè videntur necessaria, & quorum examen, applicatio, & usus, Medico debent esse perspecta atque explorata; hæc inter primariam meritò sibi vindicat partem, Aëris, Aquæ, & Locorum in quibus vitam degunt, investigatio: ab illis datur, & Regionum fœcunditas, & alimentorum qualitas, & corpori suppeditatur robur, quibus rectè se habentibus, salubritas tunc adest, justæ Aëris, Aquæ, & Locorum temperiei, meritò tribuenda: quod si econtrà quâcumque de causâ vitientur, pravos horum effectus, in animantium corpora redundare, necessum fit.

Sicuti non unâ de causâ, Aëri conciliatur salubritas, ità plurimum ope, vitari potest fluidum illud, viventibus adeò necessarium: Aër enim Athmosphericus, velut apotheca naturæ, continet quidquid è corporibus sât leve diffatur, ut in sinu volitare possit (a): ex omnigenis corporibus, sic conflatus Aër; patet, quod prò variorum Locorum situ, debeat necessariò differre; patet deindè, quod terræ emanationes, eæ præsertim quæ à Mineralibus suppeditantur, Aërem multum inquinare possint (b); constat & etiam quod ubi Aër salubris, ità & Aquarum detur salubritas, & vice versâ; concludendum tandèm, quod loca hæc salubriora erunt reputanda, quæ noxiarum exhalationum minorem copiam suppeditabunt.

His ità præmissis, faciliùs multò deducemus, quæ tum Aërem, tum Aquas, tum Loca subMonspeliensia spectant. In his, pro regione, perpendendis, jam suam navarunt operam, percelebres Scriptores, facem præferente Hypocrate; hos, impari licèt gressu, sequar, idque eò lubentiùs, quod nisi (ut cum Baglivio loquar) hæc omnia sibi comparaverint, quorumlibet Regionum Medici, vix Popularem suorum morbos, ad perfectam sanationem poterunt perducere.

MONSPESSULANUS, quibusdam **MONSPELIUM**, à parvo Monte cui infidet,

(a) Arbuthnot sur les effets de l'Air, Chap. 1. P. 3.

(b) Idem Chap. 4. P. 91.

fidet, & *Lano* vel *Lede* Amne sic dictus est (a), juxta veterem Poëtam, qui multis etiam in Locis *Agatham* vocat Civitatem, quod his testatur Versibus

Agatha floret studio medendi,
Oppidum ponto gelido propinquum,
Cui novum parvus titulum dedit Mons
Lanus & Amnis.

Hujus latitudo est 43. grad. 37. minut. longitudo verò 21. grad. 27. minut. Orientem versus. Plaga Meridionalis, oculis offert Planitiem, longè latèque se extendentem, cujus limites efformat Mediterraneum Mare, duabus circiter leucis ab oppido distans; Septentrionalem quod attinet, hæc Collibus hinc indè instructa, ad Montes terminatur: arcem versus dirigitur Orientalis Plaga; Occidentalis verò Plateam versus dictam *le Peyrou*.

Omnia commoda, situ felici & naturâ Loci cælique, obtinet Monspeffulanus quæ desiderat Hypocrates in Civitate salubri (b). Tellus nostra nec Paludibus infecta, nec confita Silvis, nec Montibus; neque Reptilium, aut animantium venenatorum, ferax esse deprehenditur; venti perflant undècumque, & tollunt damnosa miasmata; Imbres penè æquatis vicibus decidunt; æquam vulgò servant rationem anni tempestates, nec acerrimo Solis æstu torridæ, nec vi frigoris intolerabili obrigentes: Hiemem, Ver temperatum, ex æquo ab utroque extremo recedens, excipit; Autumnus, principio reffert Æstatis declinantis calores, sub finem, primos Hiemis morsus; undè non mirum quod plures exteri, delectandi, vel sanitatem recuperandi causâ, hanc nostram petant Civitatem, quodque ad provectiorem senectutem, vita Monspeli protrahatur. Plura de opibus, quibus abundat & superbit dulcissima nostra Patria, vetant effari, & tempus, & strictiores dissertatiunculæ cancelli.

Si habeatur tamen ratio situs jam memorati, facilè videre est, quid sentiendum de Aëre, Aquis, & Locis sub Monspeliensibus: etenim justà Maris Mediterranei littora, Aër, Aquæ, & Loca, insalubria sanè sunt reputanda; undè infelices Pagi, solo sedent pingui, Argilloso, Paludibus, Stagnis, imbribus collectis, (Gallicè *Mares*) undèquaquè obfuso, particulis vitriolicis, salinis imprægnato; quæ Loca insalubriora multùm fieri assuescunt, dùm Æstivis caloribus Paludes & Stagna exsiccantur, putridi namquè vapores, qui inde assurgunt & exhalantur, Athmospheram multò magis inficiunt; hinc humidum, impurum, & variis miasmatibus onustum Aërem,

(a) Juxtà Illustr. Astruc, dicitur Hebraicè *har naal*, id est, Mons serâ seu Pessulo clausus, vid. Mémoires pour servir à l'Histoire du Languedoc P. 198.

(b) Hypocr. Lib. de Aëre, Aquis & Locis.

trahunt miseri accolæ (a); undè corporis inflatur textura, relaxatur fibrarum tonus, languet motus fluidorum progressivus, inspissantur ipsamet, minimi occluduntur vasorum meatus, & sic, perspiratione insimul imminutâ, vel Planè denegatâ, plures & contumacissimi concitantur chronici affectus; cui etiam morborum generationi non parùm favent Aquæ quas epotant, Paludosæ, Stagnantes, molles, putridæ, imò nonnumquàm nauseabundæ: his omnibus adde, ventum australem quo frequenter perflantur, defectu elasticitatis ac ponderis corpus ità labefactare, ut ex horum omnium concursu, morbi endemici & non rarò epidemici his in Regionibus observentur.

Saluberrima econtrà judicanda veniunt Loca Montibus vicina; purum, elasticum, particulis aromaticis, tum e variis Plantis, tum ex Arboribus ubertim exhalantibus onustum, trahunt Aërem feliciores incolæ; hujus puritati ac salubritati respondent, Aquæ limpidæ, leves, vivæ, e Rupibus salientes, solum siccum, purum, saxosum nihil supeditat quo possint vitari; nam quamquàm in Montibus sæpè delitescant mineralia, adeò altè sepeliuntur, ut vix quicquam nocivi possit emanari; prætereà salubria hæc Loca, ventis perflantur Septentrionalibus, quibus amoveantur damnosa, si quæ sint, miasmata; quibus omnibus unà concurrentibus, exulant facies pallidæ, pedes abdominaque tumida, incolis robur impertitur, & sanitas ad extremum usquè senium conciliatur.

Hæc jam breviter exarata, de Aëre, Aquis, & Locis subMontepeliensibus, generaliora forsàn nonnullis videbuntur; verùmtamen si perparùm attendat L. B. & ad brevitatem temporis, gravissimis elucubrandis Quæstionibus concessi, & ad copiam singulatim dicendorum de variis Locis subMontepeliensibus, faciliè veniam, uti spero, concedet; præsertim si prò tanti suscepti dignitate, parùm præstitisse videar.

(a) Consul. Observ. quæ Reg. Scient. Societ. Paris. communicavit vir omni laude major D. Pitot an. 1746.



QUÆSTIO DECIMA.

De Diætâ Quadragesimali iudicium Medicum.

DIÆTA Quadragesimalis, sic dicta, ex eo quod per quadraginta dies adhibeatur, à pristinâ salubriter ab Ecclesiâ institutâ adeò degeneravit, lautioribus & exquisitorem coquinarum artem redolentibus dapibus, olerum, leguminumve absquè arte paratorum loco substitutis, ut quamplurima hinc valetudinis detrimenta ortum habuerint. Meritò igitur, statim in limine veniunt increpandi, qui molliùs & delicatius se tractant, salubriora namque, condimentis nociva reddunt.

Haud refformidandi sunt, ut moris est, cibi Quadragesimales; horum enim indolem si attentè perscrutemur, manifestissimè constabit, victus hujus rectè instituti rationem, nulla præ se ferre insalubritatis indicia. Multiplex jejulantibus offertur cibus; quidquid abortit terra, mare & flumina produnt, quæcumque fingit ars, & humana servat Providentia, in usum venire queunt; id præcipit Ecclesia, exceptâ carne, exceptisque ab eâdem oriundis, ovis, lacticiniis &c. quorum & etiam usus quotannis ferè sapienter conceditur: ex quibus facile perspicere est, pisces, frumenta, legumina, olera, fructus &c. Quadragesimalem victum abundè suppeditare.

Quid Quadragesimalis hæc Diætâ œconomiae animali generatim faveat, quidvè speciatim, docet experientia, docent Scriptorum monumenta; Pythagoras carnum esum, tamquam piaculum vitandum esse credebatur; hoc subinnuere videtur Div. Paulus in Epistolâ ad Romanos, *bonum est, inquit, non manducare carnem & non bibere vinum*. Si vetustissima intueamur tempora, homines carnibus prorsus abstinuissent, ac solis fructibus, herbis, & lacticiniis victitasse deprehenditur, multòque diutius vixisse constat; erant olim parentum nostrorum edulia, liquet namquè ex *Genesis Cap. 9º*. Deum nonnisi post Diluvium, animantia & pisces in cibum Noë & filiis ejus tribuisse; & si quid valeant Poëtarum asserta, illud his Versibus testatur Ovidius (a),

At vetus illa ætas, cui fecimus aurea nomen,
Fætibus arboreis, & quas humus educat herbis,
Fortunata fuit, nec polluit ora cruore,
Tunc & aves tota movere per aëra pennas,
Et Lepus impavidus, mediis erravit in Arvis.

(a) Ovid. Metamorph. Lib. 15.

Piscium usum nullam sanitati labem inferre, & persalubrem esse victum perspicuum credimus; millies à Galeno notatur, pisces qui frequentius comeduntur, alimenta esse boni succi; si Græcorum & Latinorum consulantur monumenta, constat in mensis pisces frequentius quam carnes habuisse, eosque multò majori studio conquisivisse (a). Notatu pariter dignissima sunt bina exempla à Galeno memorata, unum Antiochi Medici octogenario majoris, alterum vero Telephi Grammatici centenarii, quorum uterque inter familiares cibos pisces habuit: neque hic prætermittendum quod Hypocrates, alique Medicinæ antistites, hos tamquam salubria & optima alimenta ægrotantibus concesserint; non tantum, ut credidit Mercurialis, pro consuetudine, & quia maximè in quotidiano victu uteruntur, sed quia necessarium, & aptiorem sanitati recuperandæ victum hunc existimabant.

Nec improbanda pariter veniunt legumina & frumentacea, quæ prò frequenti cibo per Quadragesimam usurpantur; quin & si quid vitii habeant, levi negotio corrigitur, vel coctione, vel, ut notat Galenus, si cum aliis plantis mixta comedantur (b): plura prætereà dantur ex his, quæ non tantum in victu sanorum salubriter adhibentur, sed & in ægrotantium Diætâ, qualia sunt hordeum, avena, oriza, lentes &c. idem & quoque de oleribus tenendum.

Ast quid ego veterum exempla in medium protuli, dum quæ quotidie in sensus occurrunt prætermitto; non ne tot religiosi vitam incolumen & ad extremum usquè senium vergunt? qui non modò Quadragesimale & alia jejunia ab Ecclesiâ indicata accuratius observant, sed & quam plura alia, à propriæ Religionis instituto sibi injuncta, ita ut potiore anni partem, imò & quidam totum annum, hocce victu utantur.


Ex his manifestum fit Diætam Quadragesimalem saluberrimam esse, modò certas intrâ præscriptas leges coerceatur; nullum enim Medicum fermè fugit, hanc summè proficuum esse temperamentis siccis & præfervidis, alterique præponendam in morbis à siccitati & ariditate solidorum, simulque ab acrimoniâ fluidorum: nemo nescit, Diætam hanc, paroxismos arthriticos amovere ac antevertere, quâ fortè curarentur, si pro diro illo & chronico affectu adesset Medicina.

Nec tamèn negamus dari casus in quibus jusculum & carnes, piscium,

(a) Vid. Mercurial. Lib. 1. variar. Lèction. Cap. 25. & Zachix Quæst. Med. leg. Lib. 5. Tit. 1. Quæst. 2.

(b) Galen. in Comment. ad Hypocr. Lib. de Rat. vict. in acut.

piscium, olei & herbarum loco, substitui debent; ii sunt morbi, à laxitate & inertia solidorum, à fluidorum torpore & viscositate; sicut etiam adesse temperamenta, frigida nempe, pituitosa, cachectica, quibus nocet Diætâ Quadragesimalis; quocirca suam quilibet ipse inquirat idiosyncrasiam, consulendi Medici, sapientiâ & experienciâ docti, tuncque præjudicatas opiniones, falsasque impugnare, legitimas admittere, sapientis est & Medici.



QUÆSTIO UNDECIMA.

*Animalium in Aëre angusto non renovato detentorum
mortis causas exponere.*

OMNE animantium genus vel in Aëre, vel in Aquis, vel in utroque vitam degit; cuncta organo donantur, quo alternatim recipiant & expellant fluidum sibi proprium; in terrestribus animantibus organum illud pulmo vocatur, in aquaticis verò dicitur Branchiæ Gallicè *Ouies*; notando tamen Pisces quosdam, ex Naturæ Curiosis, reperiri pulmonibus donatos, quales sunt cete &c. ubi semel alternus hic motus, in organis jam memoratis fuit concitatus, si fortè deficiat, animantia vivere non posse res in confesso est (a).

Vitæ animantium adeò necessarium est fluidum Aëreum, ut hoc orbata Animalia, citius vel minus citò fato occumbant; juniora namque tardius adultis, aquatica amphibiiis, hæc terrestribus, in Machinâ pneumaticâ supremum ineunt diem (b); aquis submersus homo perit defectu Aëris; Pisces sub glacie, aut in aquâ unde eductus fuit Aër, citò extinguuntur: ut autem valetudo sana sibi constet, requiritur Aër purus, nec rarior, nec densior, qui sanguinis circuitui promovendo Planè sit idoneus.

Sicuti, ut jam diximus, nullum Animal vivere potest, denegato Aëris usu, ita nullum in eodem non renovato valet subsistere, ob vapores e pulmonibus non tantum, sed etiam e toto corpore exhalantes, quique consequenter propriam inquinant Athmospheram. Avicula in magno recipiente Aëre communi pleno, sed non reno-

(a) Vid. Arbuthnot effets de l'Air Chap. 5. P. 121.

(b) Idem Pag. 123.

vato, & accuratissimè clauso, moritur; Piscis in vase clauso detentus in aquis, sine renovatione Aëris, brevi perit; ubicumque magnus hominum confluxus, Aëris intoxicatio metuenda, & dum præcluso Aëris aditu, carbones imprudenter accenduntur; quantâ Aëris penuriâ laborent in Carceribus, Nosocomiis, aliisque id genus locis qui degunt, explicat Illustr. Halleſius (a), quantaque foret Machinæ utilitas, nuper ab eodem excogitatæ, cui nomen Ventilatoris indidit: silemus plerosque vapores qui e fodinis Metallicis, aliisvè subterraneis locis erumpunt, necnon nociva Aërem conspurcantia effluvia, quæ & atroces morbos, & præsentissimam mortem, hominibus animantibusque inferre posse, tragica Medicorum testantur observata.

Jam verò si quærantur causæ mortis animantium, in Aëre angusto non renovato detentorum, notatu necessarium credimus, ex Physiologicis, quod diductis & elevatis costis, depresso diaphragmate, in omnem sensum ampliatur thorax, pulmones subeat Aër, flaccidas pulmonales distendat vesiculas, complanatorum dimoveantur vasorum sanguineorum parietes, ac proindè à ventriculo cordis dextro, ad ultimos arteriæ pulmonalis mæandros feratur sanguis: huic inspirationi succedit expiratio, costæ deprimuntur, attollitur diaphragma, arctatur thorax, complanantur vesiculæ pulmonares, pars Aëris cum rore tenuissimo, sub formâ halitus tepidi foràs eliminatur.

His habitis, consequens est quod ut hæc debito peragantur modo, certa ponderis & elasticitatis proportio ex parte Aëris requiratur; debeat prætereà servari æquilibrium Aërem inter exteriorem & interiorem, quæ si deficiant, Animal patiatur necesse fit.

Suo etenim elatere defraudatus si sit Aër, perit ejus in pulmones actio, destruitur Aëris internas partes occupantis cum externo æquilibrium; ab hoc duplici malo, quot secundariæ labet exurgunt; pulmonis vesiculis ab Aëre non explicatis, brevi sanguini per viscus hocce via intercluditur, hæret ille in truncis, hinc palpitatio, anxietas, lypothimia, syncopes & asphixia: nihil ergò mirum, si post mortem apertis pulmonibus, ubiquè appareant maculæ gangræno-deæ. Aliâ ex parte, pereunte Aëris externi cum interno æquilibrium, necessariò inflatur universus corporis habitus, sublatâ enim Atmosphæræ compressione, proruunt ad cutem humores; sed præcipue Aëre expanso, turgescere debent ventriculus & intestina, hinc & dilatato vasorum huc confluentium orificio, humores quâ datâ portu prorumpere, undè vomitus nonnumquàm sanguinei; tandem a intestinis ita distractis, summa fieri debet pressio invasis horum tunica perreptantibus, & indè inflammationes brevique gangrenas accerferi: alia huc desideranda, ex jam dictis facile deducuntur.

(a) Vid. Lib. cui Titulus est *le Ventilateur*

QUÆSTIO DUODECIMA.

Quid externis Sensibus cunctis commune? quid singulis proprium sit?

SI mens nostra aliquid quovis modo percipiat, illa perceptio Sensus vocatur, cujus duplex notabilis occurrit distinctio, quippè remissci, ratiocinari, similesvè actiones mentis ad Sensus internos refferuntur, quoniam sine ullâ Sensibili mutatione organica exercentur, his præ omnibus aliis Animalibus gaudet homo; reliqui autem Sensus, qui ex mutatione corporeâ excitantur, quandoque in aliis animantibus perfectiores, Sensus externi dicuntur; hi quinque rescerentur, tactus nimirum, gustus, olfactus, auditus & visus: quid his commune? quid proprium? id indagandum proponitur.

Tactus, latius sumendo vocabulum, solo contactu, cutis beneficio exercetur; hunc aliarum sensationum esse basim, & non nisi præ minoris perfectionis gradu differre existimarunt percelebres nonnulli (a). Sensus is per totam cutim diffunditur nervorum ministerio, qui in ejus superficie, post solitas divisiones, abeunt in exiguissimas papillas, sub cuticulâ latentes, in apicibus digitorum præsertim conspicuas; facile etiam deprehenduntur in linguâ, labiis, volâ manuum, in utriusque sexus genitalibus, in mammis, aliisque partibus exquisitiori Sensu donatis, quibus innotescunt diversæ corporum qualitates, calidum putà, frigidum, humidum, siccum, molle, durum, læve, asperum &c. tactus idcirco omnibus ferè humani corporis partibus tribuitur.

Verum alio Sensu magis proprio, tactus ex Illustr. Hallero, dicitur mutatio à corporibus externis, quæ in cute orta, animæ representatur, & imprimis in digitorum manus apice; ibi enim jam memoratæ qualitates tangibiles, longè accuratius distinguuntur (b).

Corpora spiculis salinis referta, linguæ admota, hanc afficiunt & quandam excitant sensationem, quæ gustus dicitur: à tactus organo in eo tantum differt, quod præcipue in linguâ exerceatur, licet huic etiam conferant, non assentiente Hallero (c), palatum & viciniores partes, quæ illius sensationis haud omnino expertes videntur; legitur namque in Ephemeridibus Germaniæ Historia pueri elinguis, qui omnia saporum genera rectè discernebat; idem refert de puellâ, apud Acta Academiæ Parisiensis merit. de Jeussieu. Papillæ nerveæ saporum impressionibus excipiendis aptæ, ad tria genera refferri

(a) Illustr. Le Cat Traité des Sens Pag. 4.

(b) Vid. prim. lin. Physiol. n°. 423.

(c) Vid. Lib. citat. n°. 446.

queunt, à nono nervorum pari ortum trahentes, quas excipit & retinet corpus linguæ reticulare. (a)

Olfactui prospicit primum nervorum par, quod in varia & innumera filula divisum, per foramina ossis ethmoidei traducitur, substantiam penetrant membranæ cujusdam, mollis, valculosæ, porosæ, papillofæ, internam narium cavitatem convestientis, quæ pituitariæ nomine donatur, in eâquè à corporibus odoriferis excitatur tactus species, olfactus dicta.

Soni perceptio auditus dicitur, aurem esse hujus sensationis organum, neminem fugit, quæ excitatur in nervi accoustici expansis propaginibus, plura alia concurrunt, in quibus enarrandis, brevitatis causâ superfedemus, de his consulantur jam memorati Scriptores. Tandem nervus opticus in oculi fundo à radiis lucis agitatus, visus Sensum nobis præbet, de cujus organi multiplici structurâ, nihil est quod ulterius proponam, cum jam luse & eleganter ab egregio Athletâ id fuerit indagatum.

Sensibus externis compendiosè jam indicatis commune est, ex Hallero, (b) quod ab objectis exterris percussâ medullâ teneri pulposique nervi, aliquam mutationem per fluidum nerveum, ad eam cerebri sedem perferat, in quâ primam fibræ nervi perculsi oriuntur, nihil (inquit Illust. hic Vir) ultra scitur. Omnibus igitur externis Sensibus commune est, percipere rem aliquam corpori applicatam, sed quoniam unicâ in parte corporis, solis v. g. oculis percipio lucem, quam nullo alio organo sentienti percipere possem; consequens est oculum aliud esse organum sentiens & distinctum à reliquis. Lingua si ei sapidum aliquod applicetur, sentit quoquè hæc omnia calida vel frigida, & dolore afficitur, non solum in tactus, sed & in gustus organo; verum saporem quem percipimus, refferri non posse ad generalem tactum manifestum est, cum talis Sensatio nisi in linguâ reliquisque oris partibus exerceri queat.

Quid plura? omnes nervi sensuum validè affecti dolorem exhibent, undè sequitur quod dolor non tantum pertineat ad nervos tactus, sed & ad reliquos omnes sentientes; ita oculus à majori luce afficitur, auris à sono acutiori dolet, lingua à sapore acriori vellicatur, succutitur membrana pituitaria à fragrantioribus corporum effluviis; verum nec motus in gustatorio nervo erit sapidus, nec motus in oculo erit color, sed motus aliquis specialis, ab objecto excitatus requiritur. Hæc breviter & pro viribus exarata satis indicant, quid externis Sensibus cunctis commune, & quid singulis proprium sit: nunc verò

Claudite jam rivos, pueri, sat Prata biberunt.

Virgil. Eclog. 3.

(a) Vid. Falsius different. D. Le Cat Traité des Sens P. 24.

(b) Prim. lin. Physiol. n. 544.